

BERSATU, BERPERATURAN DAN BEKERJA

Tiga kalimah yang tersusun dengan kemas dan rapinya “*Al-itihad al-nazim al-'amal*”

yang bererti “bersatu-berperaturan-bekerja” adalah cogan kata baharu ciptaan

yang terbit dari otak waras dan dari fikiran Jeneral Muhammad Najib seorang pahlawan bangsa

dan perintis kemerdekaan negara Mesir yang tak payah lagi dikenalkan lebih lanjut.

(Oleh: Abdul Aziz Al-Mursyidi Mekah Al-Mukaramah)

“*Al-itihad al-nazim al-'amal*” memang satu rangkaian kata yang mengandungi sedalam-dalam makna, seluas-luas tujuan dan selok-elok ibarat kerana di dalam tiga kalimah inilah tersembunyinya tujuan besar dari dasar-dasar Islam yang tulen dan sejati. Tiap-tiap pekerjaan yang dijalankan, tiap-tiap perjuangan yang dilaksanakan oleh sesuatu bangsa tentu akan berakhir dengan kemenangan dan kejayaan yang gilang gemilang kiranya tiga dasar ini mereka jadikan perisai yang paling utama.

(1) Al-itihad- bersatu: Ini adalah dasar yang pertama sekali yang dianjurkan oleh Islam. Pemeluk-pemeluk Islam dituntut dan diwajibkan mesti bersatu.....bersatu menyembah Allah yang Esa.....bersatu menghadapkan muka ke arah yang satu.....bersatu mengucapkan kalimah al-tauhid yang satu.....bersatu menahan hawa nafsu zahir dan batin di dalam bulan yang satu.....bersatu mengerjakan amalan Haji pada tempat yang satu, saat yang satu dengan cara yang satu, tidak ada perbezaan di antara raja dengan rakyat, kaya dan miskin, mulia dan hina, malahan semuanya adalah merupakan satu umat, satu bangsa, satu taraf. Satu keadaan dan satu pada segala-galanya.

(*Wa'tasimū bihablī Allāh jamī'a walā ta'fraqū*) berpegang teguhlah kamu dengan agama Allah dan janganlah berpecah belah. (al-Quran al-Karim)- (*Al-mū'min li al-mū'min ka al-bunyān yattahidu ba'dduhū ba'da*) Maksudnya: Mukmin bagi mukmin yang lain

itu seperti satu binaan yang tersusun rapi di antara satu sama lain) al-Hadis al-Sharīf).

Demikianlah banyak lagi dalil-dalil yang menunjukkan bahawa Islam adalah satu agama yang sangat-sangat menuntut supaya pemeluk-pemeluknya daripada segala peringkat dan golongan mestilah mempunyai perasaan bersatu padu. Sedang pepatah kita Melayu ada mengatakan: (Bersatu kita teguh, bercerai kita runtuh).

Di dalam pergaulan masyarakat sehari-hari (di luar ibadah) bersatu adalah sebagai anak tangga untuk menuju ke puncak kejayaan contoh yang lebih dekat telah kita sama saksikan: Bagaimana gemparnya dunia tatkala umat Indonesia yang hanya dengan bersenjatakan bamboo runcing dan puntung-puntung kayu telah berjaya menghalau penjajahan Belanda yang mempunyai alat perang moden yang cukup lengkap dengan dataran bumi Indonesia yang kaya dan makmur itu. Ini adalah hasil dari bersatu seluruh rakyat Indonesia di kampung, di kota dan di desa menentang pencerobohan Belanda yang telah berniat sekali lagi menjajakkan kakinya yang bernoda itu ke seluruh Kepulauan Indonesia Raya.

Sekali lagi dunia terperanjat manakala King Farouk seorang raja yang memakai dasar pemerintahan kuku besi telah dapat diturunkan dari takhta kerajaan dan terus dihalau ke luar negeri oleh seorang jeneral perang Mesir yang selama ini tidak dikenali oleh dunia hatta oleh rakyat Mesir sendiri. Ini juga adalah hasil dari persatuan dan perpaduan yang telah dapat diciptakan oleh

rakyat Mesir dengan pihak tenteranya.

Ya. Semuanya.....dan segala-galanya ini adalah hasil dari kalimah bersatu padu.....bersatu tenaga, bersatu fahaman, bersatu tujuan, bersatu semangat dan bersatu di dalam segala bahagian. Kalau segala-galanya telah dapat dipersatukan di dalam badan yang satu. Maka dengan mudah sahaja segala apa yang kita tuju, segala apa kita perjuangkan dan segala apa yang kita cita-citakan tentu akan mendapat kejayaan dan kemenangan yang gilang-gemilang.

2.-Al-Nizam- berperaturan: Setelah kita sama mengetahui dan faham betul-betul bahawa bersatu itu teguh dan kuat dan sekarang kita semua telah bersatu padu telah menjadi badan yang satu, tenaga yang satu, fahaman yang satu, dan segala-galanya satu, maka tak dapat tidak di sana timbulah pula satu keinginan untuk melaksanakan natijah dan hasil dari persatuan yang telah dapat kita susun dengan rapinya itu. Keinginan yang dikatakan itu ialah bekerja dan bergerak menuju ke arah cita-cita yang telah dirancangkan kerana tak akan boleh tercapai sesuatu cita-cita dari tenaga yang telah bersatu padu tadi kalau hanya tinggal diam dan tidak cuba bergerak.

Ya memang benar, kalau tenaga bersatu telah dapat diciptakan....maka tenaga bekerja dan bergerak mestilah pula dilancarkan. Bekerja bergerak dan berusaha memang menjadi satu dasar dan keinginan yang terutama bagi tiap-tiap umat, tiap-tiap puak dan tiap-tiap kaum yang telah bersatu padu.

Tetapi.....sebelumnya kita cuba bergerak, maju ke hadapan hendaklah kita semua mesti ingat. Awas kerana segala pekerjaan tak boleh dijalankan kalau hanya dengan membabi buta....pergerakan tak akan dilancarkan hanya dengan hentam kromo....perjuangan tak akan boleh dilaksanakan kiranya hanya membuta tuli.

Al-nizam.....jangan lupa kepada kalimah kata yang keduaal-Nizam- al-Naza, asas al-Najah- berperaturan itu

adalah asas kejayaan- jangan lupa mengatur al-nizam menyusun peraturan dan rancangan sebelum menjalankan sesuatu pekerjaan dan perjuangan. Tidak ada ertinya tenaga dan fahaman yang telah dipersatukan tadi. Kiranya pergerakan yang dilancarkan itu tidak mempunyai nizam yang tertentu, tidak menggunakan peraturan-peraturan yang tersusun rapi. Pekerjaan yang dilaksanakan dengan tidak berperaturan, pergerakan-pergerakan yang dilancarkan dengan tidak bernizam, perusahaan-perusahaan yang dijalankan dengan tidak mempunyai rancangan yang tersusun rapi, sekalipun ia berdasar di atas kebenaran dan hak, maka sudah tentu akan diakhiri dengan membawa natijah-natijah yang kosong, sesia dan rugi semata. Kerana hukama ada mengatakan: "*Al-bātil bi al-nizām yaghlib al-haqq bi ghayr nizām*," - perkerjaan yang salah tetapi ia berjalan dengan mempunyai peraturan-peraturan yang tersusun rapi. Tentu akan dapat mengalahkan pekerjaan hak dan benar. Tetapi berjalan dengan tidak mempunyai nizam dan peraturan yang tertentu.

Islam adalah satu agama yang penuh dan lengkap dengan peraturan-peraturan dan nizam-nizam yang tersusun rapi dan kemas. Daripada sekecil-kecil amal hingga sebesar-besarnya Islam telah mengaturkan kanun dan cara-caranya yang tertentu. Cara beribadah kepada Allah. Cara bergaul di dalam masyarakat ramai dan rumah tangga. Cara beriktisad, cara memerintah negeri, cara berjihad dan mempertahankan tanah air daripada diceroboh oleh sebarang musuh, semuanya itu telah diaturkan oleh Islam dengan cukup sempurna dan lengkap. Sehingga bagaimana cara-cara seseorang Islam itu memasuki pintu tandas rumahnya. Juga tidak ketinggalan diajarkan oleh kanun Islam di dalam cara berperaturan. Islam tidak mempunyai apa-apa kekurangan walau sedikit juapun.

Ya. Kalau orang-orang Islam sendiri masih kurang percaya dan masih ragu-ragu. Maka selidiklah di sana barangkali segala rahsia-rahsia yang terkandung di dalam kitab suci.....Al-Quran al-KarimDestor al-Samāwī kanun Islam yang tulen dan sejati....undang-undang ciptaan

Tuhan.....yang telah mengeluarkan manusia seluruhnya dari gelap kesesatan yang hitam pekat, menuju ke arah cahaya kebenaran yang terang benderang, memasuki istana bahagia, hidup bersatu haluan, bersatu tujuan, tegap berdiri di bawah lindungan dan kebenaran panji-panji kalimah bahawa “*Lā ilā ha ilal Allāh, Muḥammad Rasūlullāh*”. (Kitab *Anzalnāh ilaik latakhrij al-nas min al-żulumāt ilā al-nūr*). Inilah kitab suci al-Quran yang diatur akan dia kepadamu (ya Muhammad) untuk mengeluarkan manusia dari gelap gelita kesesatan kepada cahaya keamanan yang terang benderang. (al-Quran).

Di samping al-Quran al-Karim tercipta al-Hadis al-Syarif perhimpunan dari perkenaan-perkenaan yang telah ditinggalkan oleh Rasulullah (SAW) guna untuk menghapuskan kesamaran hukum-hukum al-Quran yang masih tak dapat difahami oleh fikiran dan otak manusia biasa. Kalimah-kalimah kata yang tersusun di dalam al-Quran al-karim adalah kalimah-kalimah yang mempunyai erti kata yang dalam dan baligh yang ada kalanya tak dapat difahamkan dengan sekali lalu oleh otak dan fikiran manusia biasa, kiranya tidak berpandukan hadis al-nabawi. Oleh itu al-Quran dan hadis kedua-duanya adalah destor dan kanun Islam yang tulen dan sejati. Kanun yang bersesuai mengikut kehendak zaman dan masa. Kanun yang wajib dan mesti diikuti dan dijadikan panduan hidup oleh seluru manusia untuk mencapai darjat kemuliaan dan kebahagiaan di dunia dan akhirat.

Tetapi sayang.....dan amat sayang! Kalau lahir seluru umat Islam di zaman ini memakai disetor al-samawi ciptaan Allah.....berpandukan hadis al-nabawi peninggalan Rasul Allah.....dan mengikut segala hukum-hukum, nizam, dan peraturan-peraturan yang telah tersusun rapi di dalam kedua-dua kitab yang mulia itu. Maka sudah tentu keadaan umat Islam di seluru alam jagat ini tidak sebagaimana yang telah kita persaksikan di hari ini.

Alim ulama Islam zaman sekarang tidak begitu mementingkan pokok dan asal sesuatu hukum dan kanun yang terbit

daripada al-Quran dan hadis. Kebanyakan daripada mereka itu hanya melebihkan hukum furuk daripada hukum usul. Oleh itu tidak menjadi hairan jika kita dapati pertengkaran dan perselisihan faham di antara satu sama lain di dalam sesuatu hukum agama kerap kali terjadi di ruangan-ruangan akhbar dan di majlis-majlis agama dengan memakan masa yang berbulan-bulan dan bertahun-tahun. Masing-masing berkeras kepala mengeluarkan hujah-hujah yang kuat dan berjela-jela daripada *Qāla al-faḍīlat al-samāhat* itu dan *qaulā al-‘ālim al-‘alāmat* ini dengan membelakangkan qala *Allāh Ta‘ālā fī kitābih al-‘Azīz.... wa qāla al-rasul fī hadīth al-syarīf*. Dan ada pula di antaranya semata-mata berpegang kuat dengan hujah perkenaan yang keluar dari mulut seorang kiyai dan al-ustaz sahaja, dan ada pula yang terus berani mengatakan bahawa hukum hadis sahih itu tak harus dipakai (sebagaimana satu berita di dalam ruangan kopi pahit yang telah tersiar di dalam majalah Qalam baharu-baharu ini). Bagaimanakah sesuatu perselisihan faham itu dapat diselesaikan kalau hanya dengan berputar belit mengeluarkan hujah daripada *fī’l munā li al-majhawl qīl ulama.....* dan qil pak kiyai ini pada hal hujah-hujah yang tepat dan jitu. Keterangan-keterangan yang tulen dan sejati daripada *qāla Allāh Ta‘ālā fī kitābih al-azīz.... wa qāla al-rasul fī hadīth al-sharīf* hanya diketepikan dan ditolak belakang sahaja?—Bagaimanakah keadaan seseorang yang telah tersesat jalan akan dapat kembali ke tempat asal jika tidak berbalik ke pangkal jalan??? Perkara ini sewajiblah difikirkan bersama oleh alim ulama Islam seluruhnya. *Qāla Allāh Ta‘ālā: “Idhā tanāza ‘tum fī shay’ faruddūhu ilā Allāh wa al-Rasūl”*. Telah berfirman Allah Ta‘āla: “Apabila kamu berselisih faham di dalam sesuatu perkara (hukum-hukum Allah) maka hendaklah kamu kembali kepada Allah dan Rasul (yakni al-Quran dan al-Hadis), kerana dari kedua-dua kitab ini sahajalah terbitnya asal sesuatu hukum yang telah ditetapkan Allah, hukum Allah tidak akan berubah-ubah sehingga habisnya riwayat hidup seluruh manusia di muka bumi ini. Dia

takkan boleh ditukar ganti, tak memakan dipinda-pinda menurut kehendak hawa nafsu seperti keadaan kanun dan undang-undang ciptaan manusia.

Jika kita pandang pula kepada negara-negara Islam hari ini kebanyakan daripadanya telah melemparkan di setor Islam ciptaan Allah yang tulen dan sejati itu ke tepi, sebagai gantinya mereka pergunakan di setor palsu, undang-undang lencongan yang mereka cipta dari fikiran dan otak mereka sendiri yang boleh ditukar ganti, memakan diubah dipinda pada bila-bila masa sahaja yang mereka kehendaki.

Oleh yang demikian tidak menjadi hairan kalau telah kita sama saksikan pada hari ini boleh dikatakan tidak ada sebuah pun daripada negeri-negeri Islam yang mempunyai raja Islam, Presiden Islam, rakyat Islam yang menggunakan dasar undang-undang Islam yang tulen dan sejati, selain daripada kerajaan Saudi Arabia di Benua Hijaz (?). Oleh itu tak ada seorang jua pun yang boleh menafikan keadaan buruk yang sedang menyelubungi masyarakat umum di negara-negara Islam seluruhnya. Zina dan arak menjadi satu kemegahan yang besar bagi pemuda dan pemudinya. Judi dan loteri dijadikan permainan sehari-hari, tok-tok guru dan pak-pak kiyai yang taat akan perintah Allah dan menjauhi larangan-larangan syariat, mereka diperhina-hinakan dan terus diberi gelaran “orang akhirat” tak patut dihampiri, alim ulama angkatan baharu yang lebih mementingkan hukum-hukum Allah dan Rasul daripada hukum-hukum qil itu.....Qil ini terus mereka cop dengan mohor “ulama moden atau kaum muda” yang tidak wajib dipercayai segala perkataan dan hukum-hukum Islam yang difatwakan oleh mereka. Demikianlah seterusnya beberapa banyak lagi perkara-perkara munkar yang melanggar batasan agama mereka lakukan dengan sewenang-wenang dan berterus-terang.

Nizam al-Islam, destor al-samāwi yang diturunkan Allah sebagai satu suluh yang menyinari seluruh alam jagat yang dikelubungi gelap gelita kejahilan dan kesesatan, hanya mereka anggap sekadar untuk dijadikan sebagai tangkal

azimat, digantung di muka-muka pintu, di leher dan di pinggang kanak-kanak dengan tujuan untuk menghalau hantu dan menjauhkan syaitan, pada hal apa tujuan yang hakiki dan sebenarnya maka al-Quran itu diturunkan masih belum mereka fahami, mereka telah berasa bangga dan berpuas hati kiranya anak-anak mereka telah khatam mengaji al-Quran, tetapi untuk mengambil tahu segala apa rahsia-rahsia besar yang terkandung di dalam al-Quran itu, tidak mereka pentingkan sama sekali. Oleh itu tersematlah di dalam hati kanak-kanak itu satu anggapan bahawa al-Quran itu tidak ada mengandungi apa-apa erti untuk dijadikan panduan bagi menuju keselamatan hidup di dunia dan akhirat. Perasaan seperti ini terus menerus tersemat di dalam dada kanak-kanak itu hingga mereka dewasa menjadi seorang pemuda..... dan tua.

Firman Allah: *“Innamā al-mūminūn al-ladhīnā idha dhikr Allāh wajilat qulubuhum wa iżā taliyat ‘alaihim ayātut zīdatuhum imānā wa ‘alā rabbihim yatawakkulūn”*-bahawa sesungguhnya orang-orang mukmin yang sebenarnya, manakala disebut sahaja nama Allah berasa gentar dan takutlah hati mereka itu, dan manakala dibacakan kepada mereka ayat-ayat Tuhan (daripada al-Quran) nescaya semakin bertambah-tambahlah rasa keimanan mereka itu. Kepada Tuhanlah mereka bertawakal.

3-al-‘Amal- bekerja: Sekarang marilah kita kembali semula ke pokok pembicaraan, *al-amal* atau bekerja adalah kalimah yang terakhir sekali dari cogan kata ciptaan penganjur Agung negara Mesir yang terkenal itu. Amal adalah pekerjaan yang paling akhir sekali mesti dilancarkan oleh sesuatu perjuangan. Jika persatuan telah dapat diciptakan, kalau nizam dan peraturan telah disusun rapi, maka amal dan pekerjaan adalah mudah sekali dilancarkan.

Tetapi sebelumnya sesuatu amal dan pekerjaan itu dilancarkan ke tengah-tengah medan perjuangan, terlebih dahulu kita mesti mengkaji sedalam-dalamnya akan beberapa syarat yang terpenting dan tertentu disamping amal. Amal pula takkan boleh


dilancarkan kalau tidak menggunakan syarat-syaratnya yang tertentu.

Ikhlas bersemangat wang, tabah hati dan amanah adalah daripada syarat-syarat amal yang terutama dan terpenting sekali. Seseorang penganjur yang tidak mempunyai perasaan jiwa yang ikhlas. Tiap-tiap pemimpin yang tiada mempunyai sifat amanah dan tiap-tiap pahlawan yang tiada mempunyai semangat perjuangan yang bersadur wang. Mempunyai hati yang cekal tabah di dalam medan pertempuran, maka sudah tentu akan menerima kegagalan, hancur dan musnah di bawah telapak kaki musuhnya.

Oleh yang demikian sangat perlu dan penting sekali tiap-tiap amal dan pekerjaan yang akan dilancarkan itu mestilah diperbuat dan dipagari dengan semangat wang, tabah hati ikhlas dan amanah. Dengan adanya keempat-empat sifat ini tertanam di dada seorang penganjur, pemimpin dan pahlawan tanah air. Maka segala apa-apa yang dicita-citakan akan berhasil dengan tidak memakan masa perjuangan yang begitu lama.

Sekianlah sedikit huriaian dari erti cogan kata “*Al-ithād wal nizām wal ‘āmal*” yang menjadi lambang perjuangan yang pertama di dalam menghadapi sesuatu perjuangan suci terhadap agama, bangsa dan tanah air. Rebutilah kemerdekaan rampasilah hak kepunyaan kita!....Dengan memakai dasar perjuangan:

“*Al-itihād, al-nizām, al-‘āmal* – bersatu, berperaturan, bekerja”.



Usaha penerbitan buku-buku di Indonesia dari semasa ke semasa luas dan maju.

Hal ini lebih-lebih lagi masa sekarang kerana kerajaan telah memberi setuan kepada usaha-usaha Wemiputera di sana. Gambar di atas ini menunjukkan sebuah gerabak keretapi yang di dalamnya berisi buku-buku untuk dijual kepada umum. Gerabak-gerabak itu dari satu ke satu masa berpindah-pindah untuk menjual buku-buku mereka. Gerabak ini dipunyai oleh penerbit “pembangun” yang berhenti di perhentian keretapi Cerebon- Jawa –gambar Qalam.

TAN THYE HENG

THE MOST POPULAR GOLDSMITH

IN SINGAPORE

No. 152, Arab Street, Singapore.

Telephone: No. 3323

Tan Thye Heng

152. Arab Street. Singapura

Cawangan:

Thye Heng -679 North Bridge Road

Kean Heng-131 Arab Street

Singapura

Branch at:

No. 679, North Bridge Road, Singapore.

No.131, Arab Street, Singapore.